



A las adressatas ed als adressats
da la consultaziun tenor la glista

Cuir, ils 18 da december 2018

Revisiuns da leschas concernent la flexibilisaziun da las finanzas (GrFlex)

Stimadas dunnas e stimads signurs

Gouverner c'est prévoir. Cun ina politica da finanzas activa e prospectiva duain las finanzas chantunalas vegnir tegnidas en equiliber a lunga vista. Gia dapi blers onns sa chattan las finanzas chantunalas però en in stadi saun. A media ed a lunga vista sa mussan però cleras stretgas. Ils retgavs n'èn betg pli en cas da tegnair pass cun la creschientscha da las expensas. Las finanzas chantunalas pon svelt perder l'equiliber. Per il cussegl grond duain vegnir stgaffidas libertads suffizientas d'agir en dumondas da las expensas. Per cuntanscher quai ston vegnir revedidas 14 leschas chantunalas concernent la flexibilisaziun da las finanzas (GrFlex). Sco cumplettaziun stoi vegnir fixà cura e tenor tge principals che la regenza sto – en cas da basegn – elavurar e suttametter al conclus dal cussegl grond in pachet da distgargia cun mesiras da spargn concretas (concept PD). Nus As suttamettain il project GrFlex ensemen cun il concept PD per prender posiziun.

Differentas leschas chantunalas en differents champs d'incumbensas laschan al cussegl grond grondas libertads d'agir en dumondas da la politica da finanzas, uschia per exempel tar las contribuziuns a la promoziun da l'economia dal chantun, a l'agricultura ed a l'economia forestala grischuna, a la cultura, a prestaziuns d'utilitad publica dals ospitals, a la perscrutaziun u a la construcziun ed al mantegniment da vias. Sco cuncontrast a quai cuntegnan però pliras leschas chantunalas obligaziuns d'expensas fixas. Quellas èn vegnidas fixadas sez ed èn curregiblas. Pertutgadas da quai èn en spezial differentas contribuziuns da gestiun a differentas scolas spezialisadas en il chantun, la contribuziun a las scolas da chant e da musica, l'apport da meds publics generals en il quint da las vias, las contribuziuns per reducir las premias da las cassas da malsauns e singuls pajaments al persunal chantunal sco las premias da prestaziun e las premias spontanee d'almain 1 pertschient da la summa dals salaris.

Cun il project GrFlex duai il cussegl grond survegnir spazis d'agir adequats sche pussaivel en tut ils champs d'incumbenza dal chantun per diriger las expensas. Concretamain survegn el la pussaivladad da prender a temp e tenor ils basegns mesiras da distgargia, senza stuair reveder per quai singulas leschas e senza excluder da bel principi tscherts champs d'incumbenza. En quest connex stoi dentant vegnir evità che grevezzas dal chantun vegnian spustadas a las vischnancas. Tar GrFlex na sa tracti betg d'in pachet da spargn. Quant enavant che las libertads d'agir ch'existan e talas che vegnan stgaffidas da nov duain vegnir duvradas effectivamain, sto vegnir examinà e decidì pli tard en dependenza da la situaziun finanziaria efectiva e da las perspectivas finanzialas. Las cundiziuns generalas per quai duain vegnir determinadas en in concept dal proceder per in pachet da distgargia (concept PD). Il concept PD definescha ordavant, cura e tenor tge principals che la regenza sto elavurar e suttametter al conclus dal cussegl grond in pachet da distgargia cun mesiras da spargn concretas.

Las 14 leschas pertutgadas dal project GrFlex duain vegnir revedidas en il rom d'ina lescha generala. Per che Vus vesias meglier tge ch'è vegnì adattà, vegnan tut las disposiziuns da revisiun cumparegliadas cun il dretg vertent ed i èn vegnidas agiuntadas explicaziuns (preschentaziun sinoptica).

La tractativa dal project en il cussegl grond è planisada per la sessiun da december 2019. Igl è previs da metter en vigur las revisiuns da las leschas per il 1. da schaner 2021.

Ils documents, en spezial il rapport explicativ e la sinopsa da GrFlex, pudais Vus consultar e chargiar giu da la pagina d'internet dal chantun (www.gr.ch → RM → Publicaziuns → Consultaziuns → Consultaziuns currentas). Profitai da l'ocasiun d'examinar ils documents ed ans tramettai Vossa posiziun per e-mail fin **il pli tard ils 31 da mars 2019** ad info@dfg.gr.ch u per posta al departament da finanzas e vischnancas, Rosenweg 4, 7001 Cuira.

Per Voss interess e per Vossa posiziun tar quest project engraziain nus ordavant zunt fitg.

Salids amicabels

Departament da finanzas
e vischnancas dal Grischun

La scheffa



Barbara Janom Steiner
Cussegliera guvernativa

Participantas e participants da la consultaziun

- ♦ vischnancas grischunas
- ♦ regiuns
- ♦ partidas politicas e partidas giuvnas en il chantun
- ♦ chombra da commerzi ed associaziun dals patruns dal Grischun, Hinterm Bach 40, 7002 Cuira
- ♦ uniun grischuna d'artisanadi e mastergn, Hinterm Bach 40, 7000 Cuira
- ♦ uniun sindacala dal Grischun, Gürtelstrasse 24, chascha postala 668, 7001 Cuira
- ♦ uniun dal persunal chantunal grischun, chascha postala 751, 7002 Cuira
- ♦ dretgira administrativa dal Grischun (intern)
- ♦ dretgira chantunala dal Grischun, Poststrasse 14, 7002 Cuira
- ♦ departaments chantunals e chanzlia chantunala (intern)
- ♦ controlla da finanzas, uffizi da vischnancas (intern)